

山西和順縣縣志

義

人物

忠義

孝弟

節孝

流寓

仙釋

卷之八

重修和順縣志卷之八

人物志

世嘗言千里一聖百里一賢五百年必有名世似人才之生闕
乎時地然姬周之東聖賢接踵矣宋之南理學迭興則又何也
竊謂造物生材皆有可賢可聖之資克自樹立不囿於俗則地
不必不靈而時運之說不與焉和邑星纏參井壤接畿封自北
齊肇建以來不乏人傑時代綿邈雖善無徵茲參考舊乘搜訪
近聞凡忠孝義烈有裨風教者列叙姓名錄其行事他如方外
寓賢亦非碌碌無奇節者比考古者或有取焉志人物

忠義孝弟

明

傅復石城里人洪武年由監生授吏部給事中才能著稱歷陞
浙江布政使祀鄉賢

王佐字廷輔成化戊戌進士為人孤介寡合為京卿時久不調
所知諷佐往謁執政佐諾之實未嘗往又趨之行且令一隸
伺之佐過執政門仍不入所知佯問曰執政云何佐曰執政
意無他也因言其狀為之一笑後劉瑾好賄佐獨無所餽瑾
嘗語人曰世言山西人吞果然回署天曹上嘉曰海深山厚

月白風清秋水寒潭快刀利劍以南京戶部尚書致仕祀鄉賢

王雲鳳字應韶佐仲子年二十登成化甲辰進士授禮部主事轉員外郎耿介獨往足不躡公卿門嘗上疏却土魯番貢獅禁度僧傳奉諸事又乞斬權閹李廣為其傾陷下獄朝臣申救謫知陝州綽有政聲提督陝西學校教人先德行後文藝預識呂柟為狀元為國子祭酒朝夕講說以矩矱繩束諸生巡撫宣府嚴明有紀律邊政振舉羗人畏不敢入丁父憂歸服闋乞致仕平生言動有度處私室如在公庭當官甘藟鹽

視民生利害若切於身臨生死禍福不苟趨避雖與世寡合
矯矯強毅君子也太原名臣坊公居第五三立書院豎神位
河東三鳳公居一焉有虎谷集行世祀鄉賢山西提學閔煦
贊曰英敏豪邁廉靜剛方學傳古今道期賢聖屢疏弊政觸
權要而氣不撓再秉文衡畫儀禮而士以奮多方教誨感服
於六館之情悉意拊循造施夫一鎮之福惓惓忠愛之忱赫
赫才德之華

陳桂南廂里人宏治辛酉舉人是科元旦夜邑人在省城夢府
城隍廟神言第六名陳桂事繼母至孝果驗其事詳陰隲錄

諸書任蘭陽淮政剛直時流賊作亂修城守衛士民恃以無
恐居官二年丁外艱撫按保留公決去蘭陽志詳其績祀鄉
賢

王侃佐之胞弟由貢士居喪盡禮立身無玷在京講明易理居
官清潔有聲終秦府典儀以禮致仕祀鄉賢

周文永興里人由舉人任修武縣教諭立身清潔教誨有方祀
鄉賢

彭德潤高邱里人由舉人行己端方祀鄉賢

周朝著文之孫登嘉靖丙戌進士初授工部主事修通倉奏績

陞本部郎中祀鄉賢

藥濟衆在城里人由舉人歷官八任陞副使懷宗六年流賊破城殉難贈太僕寺少卿賜祭葬附錄諭祭文曰維崇禎十年歲次丁丑四月乙巳朔越初十日皇帝遣山西等處承宣布政使司左布政使范中彥諭祭原任常平兵備道山東按察司副使贈太僕寺少卿藥濟衆曰惟爾歷官勤勞忠節素著倡義登陴助貲巨萬困守孤城勢窮被陷捐軀殉難闔室淪亡軫念殘傷特頒諭祭英靈如在尚克欽承尚享祀鄉賢杜汝維壽官藥善廣施每歲冬月給棗炭以撫乞丐掃雪以飼

禽鳥

齊聞韶舉人任慶陽花馬池通判多善政時稱為誠實君子

馬任重歲貢任湖廣房山縣知縣以才能稱

杜先芳例貢任陝西渭南縣主簿流寇猖狂經畧孫傳廷委辦
軍粟深嘉才能敏練城陷全家殉難

李月蔚恩貢居家孝友舉孝廉任河南封邱縣主簿陞睢陽衛
經歷三任中州居官清介

清

李喬松由歲貢任大同府府學訓導總兵姜勳叛公執節不屈

全家八口殉難

杜先華歲貢任山東濟南府淄川縣知縣興學教士給賞勸農
山西巡按都御史王昌允旌以召父齊芳之匾

胡淑寅由拔貢任江西南康府推官平反明允致仕纂修邑志
長於詩有鐵笛軒行世

趙漪歲貢生性生聰慧天資賢良少負神童之稱讀書過目能
誦長獲名士之譽構文出口成章詩集最多今錄其詠南尖
峰一首云穿破行雲出遠峰懸崖高處植孤松時人不解堅

貞性浪說新桃多冶容

峰下有花兒坪

載通志

畢昌齡歲貢幼孤弱甘貧自守苦志讀書勉力成名及長方正
不阿鄉黨重之請除驛害與有力焉

曹文炳舉人任隰州學正補聞喜縣教諭孝行純篤廉介有守
敦純古道剛直不阿

李上雲廩生聰明勤學兼精岐黃著有摩青脈理太原傳先生
山嘗稱曰李先生方一味不可移易活人甚多

趙爾觀舉人任解州安邑縣教諭博學能文康熙甲子科與謝
陳常劉大鯤聯第時稱一榜留名士

王三錫由歲貢任清源縣訓導樸誠自矢訓士有方工楷書學

德嘉其揮毫時有林下美人之致

畢啓賢庠生鄉飲介賓品端行潔好善樂施凡邑中修建與祀
胥儒首倡屢蒙縣令旌獎為一鄉正士

藥良庠生賦性慷慨見義勇為郡守沈旌以匾曰制行縣
令陳旌以匾曰好義起群且忠孝家聲歷久未替茲三十年
巡按屬大人議舉孝廉因養親解帶就壽道八旬皇恩賜以衣
帛洵盛世之人瑞云

劉同光例監為人慷慨好義個僕不羈嘗同里人自京返里寓
宿良鄉李家店各失金百數十初疑李鳴之官追捕甚急及

後聞合家啼哭聲詢之將鬻子女以償猶恐不逮也公惻然曰金身外物耳奈何離人骨肉耶勸同失金者共釋之強而後可至今長安路上猶頌為劉老善人云

杜宏基增生孝友諫抑寧靜樸誠睦宗族和鄉黨與人從無爭論閭邑稱為長厚君子壽逾八十餘歲白髮童顏泰如也

杜宏用歲貢性至孝率真行己矢誠待人舉優行第一尤樂施藥濟貧雖暮夜扣求無不起應垂髻戴白口碑載道

徐煥在城里人正統年出粟一千石賑濟有司以聞旌表本縣南關建義民坊附錄敕書敕山西遼州和順縣民徐煥國家

施仁養民為首爾能出粟穀等糧一千石用助賑濟有司以聞朕甚嘉之今特示敕獎諭勞以羊酒旌為義民仍免本戶雜凡差役三年尚允蹈忠厚表屬鄉俗用副朝廷褒嘉之意欽哉特敕

蔡翔在城里人吏部聽選時喪母銜氏聞訃號痛步歸廬墓三年始終不怠手植松數株為墓其上後仕無錫縣大使有廉聲至出身銜名舊志失紀

趙鯨南廂里增生母卒廬於墓側三年不倦兩院碑立孝子碑劉春和在城里人開飯店每早開市必以第一碗奉父然後發

膏其父八十餘歲未嘗一日怠忽天啓六年知縣程有本中
請表其門曰天性至孝

常懷仁玉女里人執鞭營生凡出門必為父營謀所養至他鄉
遇有本縣人必購鮮食捐寄及還見其父必飲泣蓋悲其不
能躬養也知縣程有本中請旌其門曰孝行可風

楊曉昫進士個儻有氣節歷任直隸東明江西永甯知縣推陞
湖北興國州知州奏留吉安府廬陵縣勇賊攻吉安城太守
遇害公以縣攝府事力保危城再逾年賊復圍城號稱十萬
公泣血誓師困守逾兩月矢盡援絕不少哀會大雪賊輶地

洞破城公持大刀巷戰遇賊衆而死子文藻擣藻荷戈相繼
至皆遇害妻杜姬縱火自焚事聞詔旨優卹世襲雲騎尉三
世次襲恩騎尉因省光緒六年知縣魯燮光臚具事實詳請建
祠以彰忠節有傳見藝文

李就芝增生性孝品端事親五十餘年溫清定省毫無懈怠過
父病百藥不效日夜憂思夢醫告以白色石中五色活蟲可
治次日覓無所得焚香叩禱又夢馬鞍山有馬往尋果得歸
與服之數日病愈里人謂其孝有所感傳為盛事

李通伶白泉村人赤貧無倚秉性好善遇亢旱時頂神馬赤

足沿街叩禱雨降乃止為人傭工稍有口糧即補修嶺路積久不倦年五十餘病故鄉人殯之越月有武安縣人稱名來訪詢其故言降生曾宦家兵人以為好善之報也

杜培芝武生事繼孀母朝夕奉侍不離左右家雖貧每飯必有酒肉有小疵孀母見責勞而不怨

郭映參優廩生孝事雙親三十餘年後繼母失明定省奉養不離牀幕母故涕泣不止思親不置不數月相繼而亡

楊文藻廩貢生隨父曉殉廬陵殉節同治五年旌孝子

楊橋藻年一十七歲同兄文藻廬陵殉節同治五年旌孝子

陳仰為人慷慨仗義輸財無有修建不吝施予扶危濟困一鄉皆稱善人焉

祁萬安監生十五歲喪父孝事孀母友育弱弟親鄰有貧乏者無不極力周濟每歲秋夏之交早禾登場以所獲之粟分給親鄰貧乏之家至今寬厚之稱口碑不絕

郭輔品行端方見義勇為縣令賜匾持身忠厚

郭肇元邑庠生鄉飲介宿賦性剛直好善樂施享壽九十一歲賜八品頂戴旌匾年高德邵

郭瑞祥廩生居家孝友立志讀書縣令旌以一鄉善士之匾

李正峰監生世居儀村凡邑中之修建俱能首倡鄉鄰有困必多方周濟

裴泰仁高里農民少失怙母改嫁泣留不得見育於叔母及長事叔母孝友愛堂弟躬自務農作苦而延師課弟讀得遊庠有族弟某房院與泰屋毗連窮無措將出售泰操土音哭謂曰人可無坡不可無窠你有意吾以全價給你你仍留住不必立契也每遇冬寒設義漿以給行旅道光十六年歲飢出穀以分給餓者不足繼以糶糠壽七十餘終至光緒三年邑遇大祲見有兄弟爭食而蓄儲糶糠居奇者鄉人始追頌泰

之德不絕口

白昫字衡章小南會人秉性忠厚每為人勸爭息訟隣里有乞貸者無吝色猶能隱人之過成人之美村有傭工偶為穿窬被拘而逸差捕急累鄉保昫為周旋得釋事既寢村人無敢與傭交者昫先僱用十餘日傭亦改悔一芥不妄取乃見容於鄉卒為良民

趙履端崔家坪人坪與高邨南莊二村毗連故無井其祖某於道西隙地鑿旱池一美其名曰畜龍欽虎每遇天雨引衆流儲於池以供一歲之需而鄰村艱於得水如故履端曰衆苦

渴吾何甘獨飲乃擴而大之浚深數丈捨為三村公業又慮子孫無知刻石池旁以杜爭端乾隆丙午孝廉董子愚為之記

王槐優廩生東區松煙鎮人秉性剛直喜排難解紛嚴於治家子侄之成立皆其力也石南坪河路無橋人病於涉捐田數畝施橋一道迄今往來是路者無不頌德焉

李興世居城東街性揮霍而孝二十六歲失怙殯葬如禮自是事孀母愈竭其力無論昏定晨省冬溫夏清不失其時而世路崎嶇應酬有不如意事萬不令其母知懼傷親心也雖先

永川縣志 卷八 十一
母而卒抱恨終天而有子友梅學識異羣兒人以為孝德之感云

北區松溝國學生謝子聯家稱富有田園極廣佃其田者至秋交納租粟不如約數概不與校年值饑饉屢發積儲賑濟貧乏毫無吝色聞其風者莫不義之被其澤者當何如

節烈

明

李氏在城里民齋景妻年十九歲夫亡無子守節終身

馬氏廩生王煒妻煒故氏年二十歷六十餘歲先事翁姑後養

幼子子已成家居住鄉村節操凜凜凡有求嫁者即厲言拒之

藥氏監生郭廷佐妻夫故氏方二十一歲生子方週年子成立

氏年八十歲節凜冰霜

李氏廩生周士奇妻夫亡氏年二十餘子女俱無享年七十九

歲學憲旌表冰霜難犯

王氏生員周士奭妻夫故氏年十七歲杜門不出守節終身里人稱為周門二節云

潘氏廩生藥長庚妻平定宦家女適長庚年十六未逾期長庚病故氏青年守節誓不再嫁明懷宗六年流寇破城其舅濟衆殉節氏覓覓孤苦撫育猶子無異己出守節終身故年八十三歲

清

韓氏趙奮揚之母夫故氏年二十三歲矢志堅正安貧育子守

節年三十五年矣

宋氏杜宏高之妻夫故氏年二十七歲苦節撫幼子成立守節四十年矣

趙氏生員張秉乾之妻夫故氏年二十六歲事孀姑二十餘載克盡婦道守節三十六年矣

李氏武生趙思源之母夫故氏年二十七歲撫子成立入津守節三十五年矣

畢氏武生張其炆之母夫故年方二十四歲生子甫三齡端莊誠一節比松筠守節三十四年矣

胡氏武生杜士林之母寡居時年二十六歲栢舟自矢撫育二子成立學憲蔡旌以匾曰畫荻芳規迄今守節三十年矣

李氏王忠妻年十六歲適忠氏雖農家女越十三年於翁姑妯娌間從無疾言厲色及忠病故水漿不入口號泣不息親戚隣石勸之不止至五日哭無聲七日而亡

郭氏韓晉相之祖母年二十八歲孀居安貧茹荼奉姑育子克盡孝慈前縣主簿贈詩給匾以旌之年至八十二歲而卒

郝氏程奇述之妻夫故氏年二十一歲子女俱無出奉養翁姑克盡婦道守節五十二年

杜氏楊曉昫妻自焚廬陵縣畧殉節同治五年題准

李氏郭映春之妻夫故氏年二十八歲孀姑失明氏朝夕奉養不離左右遺子女四人俱幼氏苦志堅貞撫育二子成名子女婚嫁守節四十六年同治五年題准

曹氏處士李舒翠之妻于歸後孝敬翁姑夫亡氏年二十九歲艱苦備嘗訓子入津守節經三十餘年同治五年題准

盧氏監生郭映斗之妻夫故氏年二十三歲孝事繼姑勤儉持家撫育二子成名守節三十餘年同治五年題准

劉氏增生杜隆恩之繼妻夫故氏年二十九歲遺子五俱幼後

皆成名上事孀姑敬養廉盡守節四十三年未嘗苟言笑其貞潔有如此者同治五年題准

趙氏廉生青瑣之妻夫故氏年二十六歲撫三歲幼子成人入津守節四十七歲而亡

李氏焦二保妻南庄村人康熙五年遭荒夫妻赴食直隸鉅鹿縣不能相保將賣妻與人價十二兩券已立交銀之際氏泣曰你贏儘已極帶銀遠行亦必被人奪去我生不忍你獨死不如同送家死亦有人掩埋二保感病疾氏乞食供養跋涉扶持至家年仍荒氏先餓死保亦隨亡鄉人憐而埋之

陳氏生員王邦仁之妻流寇圍城仁守陣擊賊被創而死氏年二十無子有以無倚勸氏改嫁者峻言拒之自念青年易涉嫌疑因徙傍外家畜養雞豚鬻以度日五十餘年苦節自安臨終時白晝見夫入門曰辛苦多年今未接汝寢疾數日而終年七十有五

趙氏王在鎬妻鎬故氏年二十七歲矢志柏舟茹蔬四十餘年而終

劉氏郭才正妻伯叔四人康熙三十五六年連歲遭荒相繼而亡四婦改嫁所遺孤幼男女六人撫育婚嫁與子無異雖貧

始終不二其誼行鄉鄰共許

藥氏廩生曹大成妻夫婦九載善事翁姑不愧婦道夫故遺子三人俱幼氏苦志堅貞撫養孀孤俱入泮守節五十二年乾隆十年有司申請題准奉旨建坊旌表

畢氏武生青雲路妻夫故氏年三十六歲生三子俱未及冠氏上事孀姑下撫幼子冰心克堅守貧茹蔬養育兼至守節五十一年可謂一門雙節

李氏廬沂之妻沂故氏年三十一歲孝敬翁姑持家勤儉恩養幼子守節四十一年

柳氏劉杞之妻杞故氏年二十六歲守苦節葬翁姑撫養遺腹
子成立守節三十六年

李氏武生趙雪凌之祖母夫故氏年二十七歲經理家業撫育
幼孤守節三十八年矣

杜氏生員畢煥宇之母夫故氏年二十四歲撫育二歲幼子入
泮成立志凜冰霜學憲獎旌以匾曰節光彤史守節三十一
年而卒

宋氏庠生郭鎮邦之妻夫故氏年一十九歲家稍裕堂上祖姑
並繼姑俱存氏孝養備至遺一女氏撫之有成稱賢女焉守

節數十年無疾而終同治五年題准

母氏李根泰之妻夫亡氏年二十歲孝養翁姑撫育子女治理家務井井有條守節二十六年始終如一同治六年題准

白氏州同杜荷恩之妻夫故氏年二十三歲孝養孀姑教訓幼子孝慈兼至勤儉治家守節四十餘年同治六年題准

馬氏處士趙棫之妻年二十九歲夫故時翁年逾七旬三子皆幼氏仰事俯畜冰霜自矢守節四十五年現年八十歲光緒八年奉准

蔡氏處士韓廷秀之妻一十七歲于歸勤儉持家孝事舅姑夫

死即日自縊時年二十歲學憲予匾貞心烈行光緒八年奉
准

劉氏處士宋運雲之妻年一十九歲夫故氏矢志靡他有勸以
改適者厲言拒之後撫夫棺大痛投環而死同治六年奉准
田氏文童周邦彥之妻一十七歲于歸甫及五載其夫病亡氏
晝夜號哭淚盡血出服藥而死畧畔岩立有節烈碑記同治
十二年題准

馬氏處士劉喬仁之妻夫故氏年三十歲葬埋翁姑殯厝兄嫂
守節立志孀居三十年族黨稱賢光緒八年題准

韓氏鄉民陳萬海之妻子歸氏年一十六歲夫故氏年二十七
歲家極貧撫育二子成人守節三十年鄉黨皆稱賢淑光緒
八年奉准

趙氏生員李膺颺之妻子歸氏年一十六歲夫故氏年二十九
歲孝事翁姑撫育二子成立守節三十年賢淑可嘉鄉黨稱
之光緒八年奉准

鞏氏丁毓貞之妻道光十三年于歸氏年一十七歲夫故氏年
二十三歲勤儉持家守節四十一年矣光緒八年奉准

畢氏王邦錦之妻子歸氏年一十五歲夫故氏年二十三歲夙

夜勤勞終無間意守節已三十餘年矣鄉黨皆稱賢孝光緒八年奏准

劉氏處士杜金柱之妻于歸氏年一十六歲夫故氏年二十九歲貧窮孤苦矢志靡他守節已三十年矣光緒八年奉准

李氏處士宋廷敬之妻于歸氏年一十六歲夫故氏年三十歲姑老子幼貧窶難堪氏日事女紅仰事俯畜備歷艱苦矢志不移守節三十三年閭里矜式同治六年題准

鞏氏處士裴靄元之妻于歸氏年一十三歲夫故氏年二十一歲僅遺一子裴謙氏冰霜自矢善事舅姑訓子入庠守節五

十年鄉黨奉為典型同治六年題准

王氏處士杜呂棠之妻于歸氏年一十七歲夫故氏年二十三歲僅遺一子杜雲霄柏舟自誓奉養舅姑訓子成人守節三十六年始終不渝同治六年題准

李氏張鐸之繼妻子歸氏年一十六歲夫故氏年二十二歲前妻遺子張思裕方九歲己子張思敬方五歲氏視如己生盡心撫養二子入庠克振家聲守節四十九年無疾而終同治五年題准

鞏氏三奇村董三綱妻一十七歲字董事姑孝二十九歲夫故

矢志靡他備嘗艱苦撫子成立送親歸窆現年七十餘歲
曹氏小南會村白從容之妻一十五歲于歸二十七歲孀居子
在襁褓矢志苦守葬夫歸窆教子遊庠守節三十年而終
李氏三奇村張三陽之妻夫故氏年二十七歲有二女俱幼氏
苦志守節撫女擇配至今守節三十餘年

劉氏三奇村鞏萬祿之妻夫故時氏年二十三歲持家勤儉撫
子成立迄今守節三十餘年

李氏下石勒村杜玉榮妻二十八歲夫故無子適有媒勸氏改
嫁氏拒絕之後媒以重價誘氏翁計以晝夜強娶轎已到門

氏偵知之託言往隣家索錢乘隙自縊死遂成訟邑令雷獎以匾曰從一而終

宋氏小廟村文童李宗白妻白故氏年二十三歲無出子然一身立志守義撫姪如己出守節三十七年而卒

華氏南李陽村宋廷齡妻二十八歲夫故事姑訓子終身茹苦守節五十年而終

張氏紫羅村李鼎封妻夫故時年二十八歲勤儉成家守節三十七年而卒

白氏九京村張書仁妻年二十五歲夫病瘵與夫誓言不改適

夫卒氏堅守前約撫子婚配女出聘現年五十餘歲計守節三十年

杜氏三泉村左起生妻夫故時年二十歲遺幼孤氏守節撫孤守節五十年而終

陳氏裴妻夫故時氏年二十八歲生二子俱幼有親族威逼改嫁氏再三拒絕以死自誓親族不能奪守節四十三年而卒現曾孫名繡

劉氏鄭立之妻年二十九歲夫故安貧茹苦撫子成立節操凜凜現年八十餘歲

和川縣志 卷八
陳氏白 妻年二十七歲夫故勤儉持家撫幼子成立守節五十二年而卒白富保其孫也

李氏泊里村杜召茂之妻夫故氏年三十二歲遺一子一女俱幼翁姑老病氏仰事俯畜矢節終身現年六十餘歲

張氏南李陽宋暖妻年二十五歲夫故氏矢志守節敬事舅姑撫育子女待其成人壽八十三歲卒

畢氏南李陽宋延壽妻年二十四歲夫故一心守節事姑訓子始終無二現年七十餘歲

王氏平村劉更成之妻子歸氏年一十七歲夫故氏年三十歲

姑年七旬氏事之極孝遺孤三教養成人家業漸裕現年五十餘歲

宋氏東瑤邨蔡輔周之妻子歸氏年一十八歲夫故氏年二十七歲子二氏守志教養勤苦自甘現年五十餘歲

趙氏武生李魁園妻遼州真陽公楫孫女也性安嫻二十二歲適魁園越二載魁園物故氏蓬首垢面哀毀號泣勺水不入口親鄰苦勸教日後復閉口絕食而亡青年烈風志之以俟褒揚

盧洞之母李氏二十八歲夫故數月始生嗣氏逐日痛夫之亡

憐子之幼矢志完貞勤儉治家及子成立娶妻克諧以孝氏之苦衷似可少慰不意中年后偶染癱患卧病竟至八九載而子媳旨甘是奉不怠朝夕所謂親慈子孝婦順無違者非耶

楊氏部二牛之妻年二十四歲喪夫有子三歲身親稼穡用力不減男子至年長秉頗厚鄉人有欺陵者概不與校行年七十八歲

藥氏蔡步恒之妻年十五適蔡未四旬夫染瘟而歿氏悲號悼歎直欲自盡及夫三週之期氏到塋祭畢釋服而歸撤其環

瑱絕其飲食鄰里親戚苦勸勉進一餐衆去後仍勺水不入
口不數日竟殞其生後稟明縣主劉公賞給烈著皮金四字
爰勒真珉樹之墓前

李氏高邱任國多之妻生子夫故時年三十歲克勤克儉訓子
睦鄰心似枯井之水合村敬慕頌以匾曰賢孝可嘉

藥鞏氏三奇村生員藥崇德之妻生子一歲夫逝氏年二十六
父母欲令更適氏誓死不從迄今子成立家裕如也

杜王氏住北區梁家庄十四歲適杜未及一載其夫病故該氏
因姑老無依矢志不嫁擇二伯兄次子為嗣氏撫繼子如己

出至今五十歲繼子成立已生孫焉

張宋氏三奇村張錦文之妻于歸十八歲越年二十歲即寡克勤克儉撫前子如已出子亦孝敬不違氏訓村人咸贊之曰有是母有是子

北區南李陽村張蘭妻藥氏年二十五歲孀居矢志靡他治家勤儉孝事翁姑恩撫子孫五十七歲病故苦節三十餘年鄉里紳耆稟請學憲旌以壹範堪仰之區

增生張鴻舉之母王氏夫故氏年二十七家寒子幼度日維艱氏日事拮据春挑野菜秋拾遺棄以餬饜殫迨子成立家雖

小康而氏老不倦勤黻鑠猶昔學憲旌以匾曰節孝延年享
壽七十五歲

生員馬履謙之次子媳山東黃縣知縣邑人李肇敏之孫女也
嫻於閨訓舉止不凡子歸馬姓孝事舅姑人無間言二十餘
歲夫故家漸落氏傭工針黹孝不衰於孀居撫姪男以為夫
嗣訓以農務不使游蕩苦守數十年故後人無不惜焉

流寓

石勒本羯奴少游洛陽倚上東門長嘯王衍驚云此雛有異志
勒遂遁去來寓於和之北鄉以農為業史稱勒耕於野耳中

時聞戰鼓聲蓋在此中手勒與李陽住處隔五里因漚麻爭池時相格鬪二人勇力蓋不相下也及勒據鄴踐趙大天王位遣使召陽人咸為陽危陽至勒引陽臂云昔者孤厭卿之老奉卿亦飽孤盃手授陽為將軍人咸服其量焉至今以石勒李陽名其村勒嘗有言曰大丈夫當磊磊落落絕不肖曹孟德司馬仲達欺人孤兒寡婦也於戲勒亦人傑也哉

樂毅靈壽縣人燕昭王金臺市駿毅應聘將兵東伐下齊七十餘城後以燕王聽齊人之間別用劫騎代毅毅懼禍之將及也來隱於和之西鄉其地逶迤幽宵去縣六十里遂家焉至

今村名樂毅里舊志云邑之姓樂者皆其後云

孔傳

經

奉祀

聖裔

六十八代

孫自六十二代

孔真銀移居和

順土地平附紀於此亦不沒

聖裔所在之義也

仙釋

麻衣和尚姓氏不傳惟以好著麻衣即以之為名焉考寺碑云

此寺為麻衣上人修住之地貞珉尚存且上人昔在華山相

錢若水人咸奇異之因有麻衣相法流傳於今然則麻衣為

高人此剎即為勝地也夫

蓋聞豪傑挺起生死不必一其地顯晦不必一其行故或歛

義

水川集卷之六
別亦令人流連低徊云

畝而廊廟之或山林而隱逸之要其發跡之奇安貞之吉有
鱗乎其不滓者他若託身方外寄跡縉流飄飄然有仙凡之


風俗

禮儀

節序

祥異

卷之九



重修和順縣志 卷之九

風俗志

禮曰一道德以同俗又曰外和而內順此之謂盛德古人之名
斯邑者其有見於此地之人情與考之通志云民儉嗇樸實蓋
由唐虞都會遺風尚存且是邑處山谷之中水不載舟陸難行
車商賈解通止事耕鑿又氣候先寒臨秋而霜入冬而雪疲瘠
之苦為三晉最然漳水環流太行挺峙人才為山川之靈鍾者
往往間出載在往冊可考而知也至若節序以規習尚祥異以
示警戒此又觀風問俗者所宜加之意焉

志風俗

和順屬晉古唐堯舊封其民儉樸風猶近古焉

土人耕讀相半安分自守寧拘鮮通無武斷之習有古處之風
民人居萬山中商賈不通逐末者十之一二耕鑿者十之八九
糠粃自安有餘之家亦不離是間有游手游食者人咸訾罵焉
通志云風淳俗厚和順之名良不誣也

禮儀

冠嘉禮之重者家禮云男子十五至二十皆可冠擇日告祖戒
賓三加彌尊已冠而字成人之道也今廢

婚禮有六曰納采問名卜吉請期納幣親迎今和邑未能脩禮
兩姓結親止憑媒妁之一揖聞致有彼此構訟公門者自黃
公定庚帖為式男家用紅柬女家用綠柬兩家互送為執慎
重婚姻構訟免焉

喪禮三日小殮四日成服附身附棺隨貧富為豐儉哭奠無時
葬後安魄地下迎魂返室虞畢祀諸寢

祭禮用木龕棲主凡朔望令節及生忌辰有家廟者祭於廟無
者薦諸寢清明七月望日十月朔日皆掃墓致祭

節序

正月朔日鷄鳴起咸盥漱爆竹燔火設香燭供饌祭神祀先家
眾跪拜尊長稱觴上壽親友彼此往來拜賀

初五日各家掃塵土於五更爆竹送門外俗云送窮土

初七日名人七日各家上墳拜掃

初十日名實子日蒸麵象禾穗以供

十五日上元節里巷立社蒸屑糕插蓮葉穀供神逐門張燈火
三夜以祈豐年

十六日男女結伴遊行俗名走百病

二十五日祀倉神合家蒸穀麵團填倉

二月一日以灰週宅園房

二日張燈照龍角

三日各社祀文昌帝君

十九日祀觀音大士

三月清明節各家上墳封土挂紙錢具香楮醴饌祀祖

十五日祀子孫聖母設供

二十七日祀顯澤侯

二十八日祀東嶽天齊大帝

四月四日祀合山懿濟聖母

初十日祀馬王

十八日祀泰山聖母

二十五日祀蚘蜡神

五月五日裹角黍插艾葉繫色線飲菖蒲酒佩雄黃蒼朮袋以

避毒螫

十三日祀闕聖大帝設供宰牲

六月十三日於雲龍山祀大龍神

十九日祀觀音大士

七月二日祀后土聖母

七夕處女用瓦器生五穀芽供牛女乞巧

十五日農人剪五色紙挂地禳蟲拜墓祭祖

八月白露節祀火德大帝設供集會祈禱 神麻

十二日設供宰牲祀城隍尊神

十五日中秋節備瓜餅酒醪賞月

九月九日重陽節拜賀登高是月各社擇吉演戲報土功

十月一日備香楮具饌拜墓焚送寒衣

十一月冬至節拜賀新冬

十二月八日各家啜防風粥以禦寒

二十三日晚備香燈餽糖祀竈翌日掃舍宇

迎春日人多結綵扮演古事迎芒神土牛於東郊立春日記芒

神鞭土牛以送寒氣

春日春風動春江春水流春人飲春酒
春官鞭春牛

除日易桃符更門神以助春光爆竹除舊騰是日多嫁娶以為

百神無忌

按國風十五聖人獨許唐魏為勤儉迄今讀其詩曰職思其
居好樂無荒又曰糾糾葛屨可以履霜是質朴儉嗇其性然
也今地猶是陶唐古地民猶是陶唐遺民苟為之上者時加
以節性防淫之政安見獨異於古所云耶

祥異

晉太康二年五月庚寅雨雹傷禾

永寧元年自夏至秋旱

宋太平興國七年八月田禾隔二壠至五壠合穗十有三本或二十一莖合為一

明正統六年大饑

嘉靖三十一年產白兔於窰村溫紀獲之進上上云誠敬可嘉
賞銀二十兩

隆慶三年七月大雨七晝夜漂衝禾稼存無一二

神宗八年四月雨雹傷稼

十一年旱甚人食樹葉蒙賑濟銀一千五百兩至秋稍熟

十二年有年

懷宗六年六月十三日流寇臨城傷人百數十 上賑濟銀二

千兩

清

順治七年蝗

順治九年六月龍見於扒頭村拔樹數十株

十一年六月霖雨漂沒民田

康熙五年七月西門街居民鞏宏泰妻宋氏一產三男
十三年甲寅正月至六月四日始雨無豆麥秋禾大熟

三十四年靈雨連月七月二十三日嚴霜殺稼

三十五年八月一日嚴霜殺稼大饑

三十六年饑

四十二年蝗

四十四年龍挂東北

五十八年大有年

六十年地震有聲

雍正元年大有年

三年有年

七年石盆岩兩魚落地即腐

八年地震

十三年有年

乾隆九年八月十九日霜災

十一年有年

十六年有年

二十一年七月陰雨二十八日隕霜殺稼

二十三年七月二十八日大風三日百禾偃仆傷穗

二十四年秋霖雨蝗蝻

二十五年大疫大饑斗米錢五百東鄉民死亡過千

二十八年五月二日隕霜傷苗六月始雨至秋大熟

三十三年秋八月桃李華

嘉慶元年夏雨大風拔禾有偃於隴背杖皆結實是歲大有年

道光十五年霖雨傷禾方秋即凍是歲大饑斗米價值壹千叁

百餘燕麥價至柒百餘

道光十七年有年

咸豐三年官兵過境七千餘搶掠貨物牲畜城鄉男女皆逃匿
山中時 魯汀劉公署理縣事躬親彈壓有肆虐者即加之
以罰人民由此獲安官兵畏劉公之剛直羣稱為生鐵子
咸豐七年八月初飛蝗入境禱於蚘蜡廟乃止

同治六年正月至五月不雨六月初三日微雨農人幸沾薄潤
種晚禾後三日甘霖大沛苗興勃然是歲大熟

七年四月十三日烈風驟起自乾方來吹折雲龍山松樹八百
餘株甚至百餘根拔者南城樓屋脊俱傾居民房屋損壞尤
多東南關更甚

光緒三年自春至夏不雨六月微雨七月初七日復下冰雹二十三日嚴霜殺稼八月牛大疫秋未穫十一月知縣夏公京珊奉撫臺曾諭開倉放賑

四年春斗米價昂至二千零雜粟價皆一千餘流離失散死亡相籍倉儲亦空邑令夏肇庸稟請賑米五百石署任陳承燾又請米三百石在城隍廟督同紳士散賑秋有獲民心稍安五年春糧價雖稍減飢民尚苦艱食署任陳守中復請賑米七百五十石以續賑請發耕牛四十九頭給無力貧民以資開墾

六年六月十八九等日西南北各鄉柳林圍壁等二十七村先後被雹計平坡地四萬三千三百九十七畝禾稼被傷知縣魯燮光遂畝履勘據情申請給發補種籽粒銀兩蒙本州憲陳轉奉撫憲核

藩憲松 批准撥動前儲州庫穀價銀六百一十五兩零七分四釐七毫七絲五忽均勻散給被雹農民造冊詳報在案秋後晚禾成熟民皆忘災


光緒十五年四月二十八日大雪殺禾農人補種黍蕎秋小蔬光緒二十四年九月二十日晡刻縣城東南天鼓鳴鳴華望之

有黑氣一道內帶球一雙色近藍頃刻形跡全消

光緒二十八年七月中白蛾遍野遺種於草不數日化為好蚋
傷我禾稼邑人大驚虔禱於神次日降霜悉滅

宣統元年二月初二日地震有聲房屋不固者間多傾頽

民國二年七月二十日松烟鎮雷庄村西崖下有水一潭是日
大雨雨集後偶現一物望之甚異及近視之有角有鱗疑若
龍然頃刻遊游而逝莫知所終



昔孔子作春秋紀災不紀祥示戒也漢董仲舒治公羊春秋
推陰陽為儒者宗劉向治穀梁春秋數其禍福以洪範歷代諸
史因之作五行志以表災祥之變誠以天時人事隨世徵應休
咎自見神則靈妙不測天則顯道厥彰均平影響殊致同歸呂
伯恭有言曰和氣致祥乖氣致異二氣之相應猶桴鼓也覽斯
篇者庶幾常申德義以消災咎焉則又非一人之幸也